

10 MAY 1996

PM HADIRI PERHIMPUNAN PERDANA UMNO DI DATARAN MERDEKA (Bergambar)

KUALA LUMPUR, 10 Mei (Bernama) -- Perdana Menteri yang juga Presiden Umno Datuk Seri Dr Mahathir Mohamad malam ini bersama-sama pemimpin dan puluhan ribu anggota Umno menghadiri perhimpunan perdana di Dataran Merdeka, di sini.

Perhimpunan perdana itu bertujuan mengumpul para pemimpin dan anggota Umno pelbagai peringkat untuk meraikan ulangtahun ke-50 parti utama pemerintah negara.

Menurut buku cenderamata yang diedarkan pada perhimpunan itu, perhimpunan itu juga bertujuan menyatakan solidariti masyarakat terhadap perjuangan Umno melalui perhimpunan besar-besaran segenap lapisan masyarakat serta mendengar amanat penting Presiden Umno.

Dr Mahathir akan menyampaikan ucapan perdana itu pada pukul 10.15 malam.

Antara acara yang diadakan pada perhimpunan itu ialah menaikkan bendera Umno, persembahan koir dan tayangan multimedia mengenai Umno.

Yang turut hadir ialah Timbalan Perdana Menteri yang juga Timbalan Presiden Umno Datuk Seri Anwar Ibrahim dan pucuk pimpinan tertinggi Umno.

Puluhan ribu orang yang terdiri daripada anggota Umno dan masyarakat pelbagai kaum turut serta dalam perhimpunan perdana itu. -- BERNAMA

HS NAK